



Proxecto de orde do....de... de.... 2013, polo que se desenvolve o Decreto 79/2010, do 20 de maio, para o plurilingüismo no ensino non universitario de Galicia, en relación á exención da materia da lingua galega

En cumprimento dos fins previstos na Lei Orgánica 2/2006, do 3 de maio, de Educación, correspóndelle ao departamento da Xunta de Galicia con competencias en materia de educación exercer a supervisión e o control pedagóxico do sistema educativo e velar polo cumprimento das normas. En particular, debe garantir o cumprimento e aplicación do principio legal de capacitación para a comunicación na lingua oficial e cooficial.

A Lei 3/1983, de normalización lingüística aprobada polo Parlamento de Galicia o 15 de xuño de 1983, garante, de acordo co establecido no artigo 3º da Constitución e no artigo 5º do Estatuto de autonomía de Galicia, a igualdade do galego co castelán, como linguas oficiais de Galicia e asegura a normalización do galego como lingua propia do noso pobo.

Despois de establecer que o galego é tamén a lingua oficial no ensino, determina no artigo 14º a obrigatoriedade do estudo da materia da lingua galega en todos os niveis educativos non universitarios. Resulta necesario afondar no desenvolvemento dos preceptos da Lei de normalización lingüística no tocante ao ensino, por ser un sector fundamental para a implantación de hábitos lingüísticos en galego, e establecer unha regulamentación do galego que facilite



o seu coñecemento e emprego en todos os niveis, e etapas do ensino non universitario, erradicando especialmente o seu emprego sexista en todos os ámbitos e respectando, así mesmo, a situación sociolingüística en que se enmarca cada centro. Neste contexto, no mesmo artigo 14º da citada Lei, ordénaselle ao Goberno galego á regulamentación das circunstancias excepcionais nas que o alumnado pode ser dispensado do estudio obrigatorio desa materia. Para tales efectos, o Decreto 79/2010, do 20 de maio, para o plurilingüismo no ensino non universitario de Galicia fai compatible o carácter obrigatorio do estudio da materia da lingua galega en todos os niveis educativos non universitarios, con determinadas causas taxadas que xustifican o réxime das exencións posibles, as que se caracterizan pola concorrencia dos seguintes requisitos:

1. Que a xustificación da exención atope fundamento nunha circunstancia obxectiva de incorporación ex novo ao sistema educativo de Galicia.
2. Que o alumnado de nova incorporación proceda doutras comunidades autónomas ou dun país estranxeiro.
3. Que a incorporación ex novo ao sistema educativo de Galicia se produza no terceiro ciclo de educación primaria, na educación secundaria obrigatoria ou no bacharelato.

A exención do estudo da materia da lingua galega nos diferentes niveis e etapas dos estudos non universitarios, polo seu carácter restritivo, non se pode



estender a aqueles supostos nos que o alumnado que realizados estudos en Galicia, curse fóra da comunidade autónoma tres cursos completos ou menos, e se reincorpore posteriormente ao sistema educativo galego, xa que logo, de ser o caso, a volta ao sistema educativo en Galicia, non pode interpretarse como se dunha incorporación ex novo, se tratara, senón como unha reincorporación para o que non está previsto a exención.

Considerando que o Decreto 79/2010, do 20 de maio, recolle nos seus artigos 18º e 19º, con carácter excepcional, o contido das posibles exencións e o procedemento de tramitación daquelas, e que a disposición derradeira primeira daquel decreto autoriza á Consellería con competencias en materia de educación a ditar as disposicións que procedan para o desenvolvemento e execución daquel,



DISPOÑO:

Artigo 1º Obxecto.

1. Esta orde ten por obxecto regular os distintos supostos excepcionais e taxados nos que o alumnado pode solicitar a exención da materia da lingua galega nos diferentes niveis e etapas do ensino non universitario.
2. Regular o procedemento e prazos para a solicitude da exención.

Artigo 2º Principios xerais.

1. De acordo co establecido no artigo 14º. 2) da Lei de normalización lingüística o alumnado que realice todos os estudos en Galicia deberá cursar e superar a materia de lingua galega e non terá dereito a que se lles conceda exención.
2. Tampouco terá dereito a exención o alumnado que, realizados estudos en Galicia, curse fóra da comunidade autónoma tres cursos completos ou menos e se reincorpore ao sistema educativo galego.

Artigo 3º Requisitos para a obtención da exención temporal.

1. O alumnado, procedente doutras comunidades autónomas ou dun país estranxeiro, que se incorpore ao sistema educativo de Galicia en 3º ciclo de educación primaria, en educación secundaria obrigatoria ou en bacharelato



poderá obter unha exención temporal da cualificación das probas de avaliación da materia de lingua galega durante un máximo de dous cursos escolares.

2. A exención poderá concederse en dous cursos non consecutivos.

Artigo 4º Deberes do alumnado exento.

1. A exención suporá a consignación de exento nos documentos oficiais de avaliación do alumnado.

2. O alumnado terá que asistir ás aulas como medio de integración lingüística e coa finalidade de que co seu esforzo persoal, con materiais didácticos específicos e cunha axuda continua do seu profesorado poida ter, ao remate do prazo da exención, un dominio adecuado da lingua galega, e seguir as ensinanzas propias do nivel no que estea ou vaia matricularse, en igualdade de condicións que os demais compañeiros ou compañeiras da clase.

3. O incumprimento por parte do alumno ou da alumna do establecido no punto anterior determinará a revogación da exención, logo dos informes pertinentes e oída a persoa interesada ou, de ser o caso, os seus proxenitores, titores ou titoras ou representantes legais.

4. A revogación ou denegación da exención producirán como efecto para o alumnado a obriga de ser cualificado nas avaliacións parciais e finais ao final do curso no que se atope.



5. Nos respectivos documentos oficiais de avaliación farase constar a exención concedida e, de ser o caso, a posible revogación e a conseguinte cualificación.

Artigo 5º.-Presentación da solicitude da exención.

1. A solicitude da exención da materia de lingua galega deberá presentarse en soporte papel por calquera dos medios establecidos no artigo 38.4 da Lei 30/1992, do 26 de novembro, de réxime xurídico das administracións públicas e do procedemento administrativo común, utilizando o formulario normalizado que figura como anexo I desta orde, dispoñible na sede electrónica da Xunta de Galicia, <https://sede.xunta.es>. A referida solicitude irá asinada polo alumno ou pola alumna solicitante ou polo seu representante legal, se é menor de idade, e nela exporanse as razóns polas que se solicita a exención.

2. As solicitudes dirixiranse á persoa titular da dirección do centro docente onde o alumno ou alumna curse os seus estudos.

A exención solicitarase para cada ano académico de permanencia na Comunidade Autónoma de Galicia e os seus efectos limitaranse ao citado ano, sen que se poidan conceder mais de dous cursos escolares, conforme o previsto no artigo 3º.1) da presente orde.



Artigo 6º.-Prazos de presentación da solicitude da exención.

1. O prazo de presentación da solicitude empezará o 1 de setembro e rematará o 5 de outubro para o alumnado dos centros de educación primaria, secundaria obrigatoria e o 20 de outubro para os dos centros de bacharelato.

2. Cando se trata dun alumno ou alumna con traslado de matrícula viva, procedente dun centro doutra comunidade autónoma ou do estranxeiro, o prazo de presentación da solicitude será dos vinte días seguintes á incorporación da persoa interesada ao novo centro.

3. Para o alumnado que se matricule en ensinanzas de persoas adultas (ensinanzas básicas iniciais, educación secundaria ou bacharelato) o prazo de presentación da solicitude será dos vinte días seguintes á presentación da súa solicitude de matrícula nesas ensinanzas, dentro dos prazos oficiais sinaladas para estas.

Artigo 7º Tramitación das solicitudes.

1. A cada unha das solicitudes de exención a persoa titular da dirección do centro lle engadirá unha fotocopia compulsada do expediente académico, ou do historial académico, agás naqueles supostos, para os que a presentación ás probas libres para a obtención do título de graduado en ESO, ou para a obtención do bacharelato, non se teña que acreditar estudos previos.



2. Coa finalidade de rexistrar as solicitudes de exención, os centros con acceso ao sistema XADE, disporán dunha pestana para incorporar os datos das solicitudes de exención, así como, de ser o caso, das correspondentes resolucións de concesión, denegación ou revogación. Os centros sen acceso ao sistema XADE enviaránlle á xefatura territorial correspondente unha listaxe das exencións tramitadas, das concedidas, das denegadas ou das revogadas.

3. No caso de centros privados e privados concertados, se a solicitude de exención é de bacharelato, a persoa titular da dirección do centro terá que enviarlle a referida solicitude e a documentación daquela á dirección do centro público ao que estea adscrito, e se a exención é doutra etapa (educación primaria ou secundaria) enviaralle a documentación á xefatura territorial correspondente.

Artigo 8º Defectos documentais e emendas.

A requirimento dos respectivos centros, os defectos documentais que se aprecien durante a tramitación das solicitudes, terán que ser emendados polo solicitante no prazo de dez días, de acordo co disposto no artigo 71 da Lei 30/1992, do 26 de novembro, de réxime xurídico das administracións públicas e do procedemento administrativo común. Transcorrido ese prazo sen que a emenda fose efectuada, a solicitude archivarase sen máis trámite.



Artigo 9º Resolución da solicitude de exención.

1. Os centros docentes públicos dependentes da Consellería con competencia en materia de educación, resolverán sobre a concesión ou denegación da exención no prazo máximo de dez días hábiles a partir da recepción da correspondente solicitude.

2. No caso dos centros docentes privados e privados concertados que imparten bacharelato, a resolución correspóndelle á persoa titular da dirección do centro público ao que estea adscrito, e á xefatura territorial correspondente para o caso de centros que imparten educación primaria ou educación secundaria obrigatoria.

3. Nos supostos nos que resolve a xefatura territorial correspondente, a resolución enviaráselle por triplicado exemplar á persoa titular da dirección do centro, que a notificará ao alumno ou alumna ou ao seu representante legal, se é menor de idade. O segundo exemplar engadiráselle ao expediente do alumno ou da alumna, e o terceiro exemplar será devolto polo centro educativo á xefatura territorial xunto co xustificante do recibimento, no prazo máximo de dez días, dende que teña constancia do acuse de recibo.



Artigo 10º *Recursos*

1. A resolución da exención poderá ser impugnada mediante o recurso potestativo de reposición ou dealzada, segundo os casos, no prazo dun mes, perante a persoa titular da xefatura territorial correspondente da Consellería con competencias en materia de educación, e porá fin á vía administrativa.

Disposición derogatoria

Disposición derogatoria única.

Quedan derogadas as normas de igual ou inferior rango en canto contradigan ou se opoñan ao disposto nesta orde.

Disposicións derradeiras

Primeira. Autorízase á Secretaria Xeral de Política Lingüística e a Dirección Xeral de Educación, Formación Profesional e Innovación Educativa para que, dentro das súas respectivas competencias, ditén as resolucións ou instrucións que sexan precisas para a execución da presente orde.



Segunda. Esta orde entrará en vigor o día seguinte ao da súa publicación no Diario Oficial de Galicia.

Santiago de Compostela,de xullo de 2013

Jesús Vázquez Abad

Conselleiro de Cultura, Educación e Ordenación Universitaria